

Konfliktiråd-imut inatsit nr. 467 12. juni 2009-meersoq, tassa pineqaatissimeersimanerup qaangernerani pinerlussimasup pinerluffigineqartullu akornanni kiinneqatigiilluni oqaloqatigiissinnaanermut siunnersuineq, Kunngip akuerisaanik Kalaallit Nunaannut atuutilersinneqarsinnaasunnngortikkumallugu Naalakkersuisut danskit Naalakkersuisuinut isumaqatiginninniarnissaannik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Aleqa Hammond, Nunatta Qitornai)

Akissuteqaat

(Peqqissutsimut, Isumaginninnermut Inatsisinillu atuutsitsinermut Naalakkersuisoq)

Siullermeerneqarnera

Aalajangiuffigisassatut siunnersuummut saqqummiunneqartumut massumunnga Inatsisartunut ilaasortamut, Nunatta Qitornaanit Aleqa Hammondimut, Naalakkersuisut qujapput.

Pinerluttulerinermi suliani eqqugaasut aamma pinerliisut akornanni isumaqatigiissitsiniartarnerup eqqunneqarnissaa isumassarsiatsialaammat Naalakkersuisut isumaqatigaat. Tamanna Eqqartuussiveqarneq pillugu Ataatsimiititaliarsuarmi innersuussutigineqartumut naapertuuppoq, tassalu pinerliisooq iliuutsiminut akisussaasunnngortinneqartarnissaa pingaaruteqartoq, aamma pinerliisup akisussaaffilerneqarnera inatsisigut aaqqissuussinermut taamaallaat naleqqiunneqassanngitsoq aammali eqqugaasumut najukkanilu inuiaqatigiinnut tamanut naleqqiunneqassasoq.

Eqqartuussiveqarneq pillugu Ataatsimiititaliarsuup innersuussutaa tunuliaqutaralugu Eqqartuussisarnermik Inatsimmi § 319-imi akerleriinnik isumaqatigiissitsiniartarnerup eqqunneqarsinnaanera periarfissiussutigineqarpoq, tassanilu allassimavoq Justitsministeeriaqarfik, Namminersorlutik Oqartussat oqaloqatigereerlugit, akerleriinnik isumaqatigiissitsiniartarnermik misiligutitut aaqqissuussinermik pilersitsinnaasoq.

Eqqartuussinermi aalajangiinnermut taarsiullugu imaluunniit eqqartuussinermi aalajangiinnermut tapiliullugu akerleriinnik isumaqatigiissitsiniarneq pillugu misiligutitut aaqqissuussineq pilersinneqarsinnaavoq.

Misiligutitut aaqqissuussineq aallartinneqassanersoq aamma aallartinneqassappat qanoq isikkoqarluni aallartinneqarnissaa pillugu misiligutitut aaqqissuussinerup aallartinneqannginnerani Justitsministeeriaqarfimmit Kalaallit Nunaanni Eqqartuussiveqarneq pillugu Siunnersuisoqatigiinnit oqaaseqaatinik pissarsiniartoqassasoq naatsorsuutigineqarpoq.

Tamanna tunngavigalugu Kalaallit Nunaanni Eqqartuussiveqarneq pillugu Siunnersuisoqatigiit aqutsisoqatigiinnik pilersitsippat, taakkulu Kalaallit Nunaanni pissutsinut immikkut naleqqusarneqarsinnaasumik misileraanertut aaqqissuussinermik inassuteqaasiortussaapput.

Maannakkorpiaq taamatut aaqqissuussinissaq pillugu isummernissamut tunngavissaq Naalakkersuisut Justitsministeeriaqarfiullu akornanni suleqatigiissutigineqarpoq.

Kalaallit Nunaanni pissutsinut naleqartitanullu naleqquttumik periaatsimik eqqortumik nassaarniarneq siunnertaralugu, immikkut ittunik ilisimasalinnik peqataatitsisoqassaaq.

Kalaallit Nunaanni Eqqartuussisarneq pillugu Inatsimmi taamatut ittumik aaqqissuussinermik periarfissaqareenera pissutigalugu, akkerliinnik isumaqatigiissitsiniartarneq pillugu inatsisip Danmarkimi atuuttup peqqussutitut atuuttussanngortinneqarnissaa pisariaqanngitsoq, Naalakkersuisut isumaqarput.

Taamaammat siunnersuutip itigartitsissutigineqarnissaa Naalakkersuisut innersuussutigaa.